

四庫全書

集部

欽定四庫全書

筠軒集卷十

元唐元撰

記

周彥明繼善堂記

出城二里而近曰南宮里先輩周先生元仁居之先生
明麟經學身幹修整音吐洪暢余生晚與先生同肄郡
庠因得互借文字甚相好也後四十年始識其曾孫原

誠彥明時番克用朱君創詩會因造其廬焉穹其門闔
種竹數萬箇環拱几席大稱先人隱居之勝酒罷賓退
彥明有請于七十八叟唐元曰吾祖敝陋數椽經二百
禩不庇風雨嘗侍家尊撤而新之今祀先有室譙賓姻
有堂寒煥有寢樓典籍有庋吾父以繼善扁其楣願丐
先生一言夫繼善雖本易系然繼志述事於子道尤切
大抵涵養本源莫大於讀書大父麟經故藏尚無恙生
其讀之矣聖人直書其事而美惡自見生其深究之其

可以自已乎昔嘗互借文字猶記有浩然王維審言三
大家詩生其讀之矣盛唐風氣醇厚無纖巧萎備之陋
生其玩索之其必有新得乎人生莫大於孝友出而授
諸生有講誦之煩歸侍其親有溫清之問叢篠未直者
扶而正之菰韭已割者行而補之清溪在前可釣可遊
以為甘旨之助羣峯崢嶸可吟可嘯以適性情之真昔
人有言為善最樂爾祖之嘉言善行尚有攷也以善為
繼善不已多乎況生為後來之秀其於世學善廓之而

有餘地矣

董氏存誠堂記

董氏之先以良史直筆見於春秋以正義不謀利之說
高視漢儒家傳丕緒有自來矣鄉大儒朱文公學繼源
洛前追洙泗當時門人高第散居四方惟淑重董先生
當文公過家上塚為書數百言極論自脩之要治人之
方我文公深加器賞想其鳴騶入谷賓友咸在欬唾珠
玉散之草木發為幽香至今郁郁芬芬未已也四世孫

宗敬永懷前猷冀保不墜廼作堂於綉水之上榜曰存
誠志念深矣乾之九二釋彖曰閑邪存誠邪既閑誠斯
存矣西銘言大人存誠心見帝則此作聖功用在後學
涵養須用敬耳君字宗敬於義甚協苟於事親從兄親
師取友應事接物之際一以敬為吾心之主常思若祖
謂見文公時進退有度唯諾必恭於是乎抽關啓鑰得
聞至論昔之心法今之家法也由是進而存誠固其所
也宗敬日玩編簡趨向端方益將大其家聲而無忘其

先人介鄉友余宗文來乞銘銘曰卓爾先哲篤生紫陽
先哲伊何吾道之綱我出我車過家上塚英英學徒有
來叔重寔與道契昌哉其言亦既寵嘉以貽後昆雲孫
作室戰兢是競由敬達誠用宏先訓

醒心亭記

星源之嚴田古號山水之勝風氣蓄聚鍾為衣冠之區
非易地比余二十餘一再過家上塚廼拜伯父直軒先
生於堂上居有間經石山僧舍尋青羅石洞因謁江東

表兄江東有學而文吾樂與之談焉初未知醒心亭之所在也後五十年為至正乙酉秋七月表兄深谷翁書來曰吾兒某從族家購醒心故址今亦亭於其間亭在上田市心鼻祖所創不知所由始而朱文公父常齋先生所為記尚如星月炯然地延袤若干中闢一大池歲蓄魚利以供賓養傍植花竹果木有足觀者吾弟號能文其為記之元謂醒心之旨非儒先何能知之世之人醉而醒夢而醒似喜豁然過一關矣然醒而復醉醒而

復夢膠擾紛雜何時而可已耶苟知吾心之常醒則不墮非僻日進高明亦曰持吾敬而已昔淵明愛臥醉石德裕愛臥醒酒石二公至竟沉酣於麴蘖之中未可定議元又聞歐公創亭於滁州泉水之涯亦名醒心吾鼻祖必有默契焉南豐曾氏為之說曰今同遊之賓客尚未知公之難遇後千百年有慕公之為人而不可得也元每讀至此有異代尊賢之嘆兄今年八十二清健如五六十人子孫環侍酒後目熱想其意氣豪邁不減年

少時以是知兄之亦難遇也走也病足槃散雖欲一見公而不可得又何論千百年之遠哉其所感發有甚於歐公之在門者雲林蒼蒼南山在望祝兄之壽惟朝夕惓惓耳吾家仲容力還故物上以悅親可謂有志者宜得以書是為記

竹林讀書所記

竹林讀書所者潘子彞之所構也子彞幼從從父月菴延師講授天姿警悟步趨應對異常兒從父甚愛之比長

而脩讀志不輟廼去祖居故廬若干步於萬竹中營一
室焉深靚閑雅買書數百種度而列之每於治生奉親
之暇日事吟諷不以寒暑廢屢介仲氏信卿請為記余
雖不識子彞重信卿之請得無言乎余謂嵇阮與諸賢
為竹林遊唐李白孔巢父輩為竹溪之飲不過放浪形
骸沉酣麴蘖耳樂廣所言名教內自有樂地舍讀書之
外他無有也想其扶疎蕭瑟響振鸞鳳即吾音吐之宮
商也霜凌雪厲獨立不懼即吾志操之堅貞也大者儼

立小者拱侍即吾閨門之孝友也縱橫瑣細摸寫地文
即吾辭藻之絢麗也又使吾視聽無非僻之干動靜有
夾持之益古人謂一日不可無此君豈直為遊觀之適
哉書吾嚴師也竹吾交友也師以問道友以輔德也此
豈非月菴之昔所期待而余之所以三致意也生其力
勉之余家武山下三十年來種竹盈門於子彛所好似
有瓜葛江湖士大夫有繪為圖以見貽者頃自金陵懸
車益自培植然為饑所驅而未遂杜門讀書之願因是

而有感焉第恨平生未見之書尚多吾豈甘衰老而自棄哉或有聞而嘲笑者亦在所不荅可也是為記

徽州路重建行用鈔庫記

泉布之制其昉於中古乎夏商以前幣為三品太公設九府圜法周置外府而掌邦布泉泉有流行之義布有分布之義皆所以崇國本而厚民用也歷代小大輕重不侔惟漢五銖號合中制閱世變更而勢不能久子母相權然後楮幣興焉國朝郡設平準行用鈔庫官吏胥

徒各有其人京師歲給鈔本上下民數用以爲等差乃
命長官提挈綱領較其出入之多寡嚴其扁鐫禁其移
貸日從民便若互市者焉夫以鏤銅爲質丹墨其文託
尺紙之書而行千金之貨良賈規利細民資出旦旦委
命於營求而甚於水火手持篋探摩挲熨帖而不能保
其勿壞於是又立卻故易新之法其於國計損之者寡
於民計益之者多損之益之與時宜之是法之行蓋有
揜前代之所未有者盛哉盛哉至正二年壬午正月徽

民不戒于火延燒庫路達魯噶齊某公用是憂懼起
謀作新廼諭于寮屬曰構室莫重於立基未有立基而
室不永固者舊址湫隘迫逼民廬今欲闢之延袤若干
而售民以書院地若庫若堂若門有嚴位置穹其垣墉
以為扞蔽役大而期不亟功就而民不勞侯之用心勤
矣掄昇邑丞張某以董其役父老來請記元謂宣上德
而重國資起宿弊而圖遠畧太守能事也百世之利其
在茲歟其在茲歟

徽州路重建譙樓記

徽為郡因山為城水自鄣山來東走百里而匯於城下
前導廳事累土石為臺而屋其上麗譙攸始事載郡乘
北據乾而有金蓮之奇南面離而有紫陽之勝西挹允
而為黃羅靈山東引震而為花屏仙宅大江之南號為
大州得非山水有絕特之異耶厥壤剛瘠梯耕寸耨經
灘三百餘下抵淞江勢在半天上以故潦至蔑以容而
歲以旱告民生其間亦艱矣至正二年壬午正月居民

弗戒延燒官寺庫藏而樓例災於是合寮佐以重建稽
春秋隣國卹災之故而勤其事於屬邑休寧輸財庀工
考示圖式咸曰老於近民通練庶務無如別駕李公之
賢者今觀其柱石凝定以堅以固甍桷比密若翔若舞
厯階斗折無登陟之勞列楣矢直無垂堂之懼民有子
來之喜而侯無厭射之容心匠殫巧介石自規可謂有
終始者自某月甲子始事至某月甲子卒工父老請於
郡士唐元曰子其記之夫有宇宙以來則有此山川上

棟下宇制繇往哲寒暑迭禪興廢相乘使智無遺謀而
勞不弛力此侯所以功成而事周者歟今夫霧靄溟濛
廓然光霽而登于茲者其思探幾測隱而公道有必伸
者乎祁寒暑雨以游以衍而登于茲者其思挾纊重於
溫言而省耕苦於塗淖者乎錄囚奏讞擇勝高爽而登
于茲者其思簿責異情偽而寬宥之有道者乎豆觴使
客相羊休沐其思品嘗雋永而何所自致者乎古之所
謂循良吏而重民事者大類此大抵國有臺所以望氛

祲而察災祥處臺榭所以即高明而舒眺望于以蠲凝
雪滯于以啓益聰明注靈想於埃壚之外以為出政令
之本豈徒觀覽哉由是論之紀事銘庸申言歆動合工
箴之義誦以所聞其敢不恭侯名榮祖廣平肥鄉人今
為奉政大夫徽州路總管治中主休寧縣簿柴某實董
其役上無慢命下無違情宜得牽聯書之

山林讀書所記

延祐丁巳秋余與平叔鮑生同舟游錢塘周旋旅席者

彌月始得其為人大抵年妙而多聞盛氣不屈殆有志
於學者也別去四年一日訪余郡庠且告之曰吾世居
歙之鮑潭自吾之先以儒名于鄉居則粗有山林池圃
以娛其生游則粗有杖屨釣弋之具以節其勞賓至則
粗有魚稻蔬果酒醪以致其禮吾知繼述之為難而凜
凜乎其恐墜也於是朝夕守詩書之業而不敢肆焉里
之隱君子名吾室曰山林讀書之所願徵言於子子以
為何如余曰凡物必得其所而後為安者物之情也是

故善游江湖者必擇其所於舟趨越而走燕者必擇其所於車有方體而不可易是其迹之所繫而安焉者雖他物有弗能奪也猿狖之所家樵牧之所羣此好紛華者之唾棄而有志于學者之所安也抑子之能擇以為進修之所宜非軒牕之淒潤而簷楹之開明耶嗚呼特其寓者目吾之一心在理為太極在天為北辰大而彌綸天地之化而一言可盡曰誠推而為三千三百之儀其要惟在於持敬是以君子之所其無逸蓋以是而為

安之大者苟一為不善不能少忍於須臾則有操君子之名而去之者此為士之甚懼也今而知吾子之氣有不屈者足以亢其宗志益厲者足以進於學無昔人之懼有鄉人欲之之榮其可毋得於聖賢膏馥之所溉灌耶謹身節用率妻子以奉其親聯其兄弟豈止事夫章句詞藻之末而已哉雖然余猶將有以復于子者夫通都大邑萃天下之材意必有洽聞之士觀會通以行典禮固非滯一隅以為道者子其出而求之余也操觚執

繫居困而欲不失其所子其何以處我耶

艮軒記

輶星止車金柅亦止車衣袵止水囊沙亦止水凡物尚
爾況於人乎是故言止無憂行止無辱飲知止則悟濡
首之戒食知止則無吐茵之嫌鐘鳴漏盡而夜行不休
與功成名遂身退何翅相千萬也吾友君章朱君居城
之東北隅踞山面市榜其軒曰艮益勞形知止而恥於
夜行者也君綿歷邑吏考滿居休孰不奮臂掀袂日期

君則訥訥然斂退不暇方洒掃丈室左圖右書種花蒔竹為娛老計殆知止而逃夫憂辱者歟某遂告之曰腓隨足動心與物移目因色奪耳逐音馳惟良其背物各有止匪背而良止其大耳昔淵明休官歸栗里風致高甚平生好飲忽復止酒平日携子姪遊遽曰步止幕門豈劉柴桑諸人所能伯仲者耶余與君總角交今皆為六十人寓齋相去尺咫時復往還君不勝杯杓聊復一中則可飲可遊毋乃益賢於淵明者耶君相視大笑請

次第其說為記

賓雲菴記

乾明誠齋程公營壽藏於問政之原即其東偏築屋數楹經卷藥爐具在槃桓於其間暇日告余且勗之遊時濟南程生益與之俱自東城抵候賢亭五里而近山光盤鬱松篁掩冉已可人意又自候賢至原頭里許直前延矚超忽無際有黃山梯空煙雲吐吞長溪東走蜿蜒澄深殘曛微漏青紫溢野於是引清嘯躋層巒天風吹

衣令人有神遊八表之想顧謂程生曰今日之遊樂矣
遂造其居公作而言曰吾構室稍久未思所以名之子
寧無意於斯余為題之曰賓雲夫雲水土輕清氣也獨
不見膚寸而起不崇朝而雨天下非草木之功乎若烟
非烟郁郁紛紛非瑞世之應乎解形而遺世乘白雲而
上賓又非學道之志願乎公曰唯請以是名雖然余聞
方外之士吹呴呼吸吐故納新金丹既成白日飛昇古
今謬悠誤世甚矣公學老子法為黃冠師迺不泥其師

說若有究夫人道終始而預計埋骨之所焉可謂不惑也已
是宜書公名應誠自號誠齋嘗道錄吾郡宣授提點乾明觀事克承先業興脩有功具見觀誌

西南隅新建土地祠記

按后土為顓頊氏之子孫官民得以通祀者豈非常治水
土而有功於民者歟今之里巷各立土地祠至若家自
為祀事之彌謹不啻如所親然考諸禮經或為中雷之
神儒先又謂即古之社稷如是則有功於世官民通祀

為宜西南隅富山之麓昭慶院之前井亭土地有祠厯
年最深元貞乙未罹燬既而里人解德創樓張炬為忠
烈汪王慶生樓之稍東繪像立祠故基狹陋弗稱神居
至治初元鄉之長者汪浩與其猶子某議遷今址於是
募衆鳩庸式新厥宇復得塑工自西江來執藝惟良衣
冠檐如衛從嚴竦靈光動盪觀者稱異夫神依人而行
人所自為而神是鑒之里俗仁厚則福以類應毋諂毋
怠事神之道脩矣謂予不信請質之后土氏是為記

興道觀張公捨田奉先記

三代而上教出於聖人故生事祭葬為人子者得以盡其心三代而下教或移於二氏乃有離形獨立而天倫之愛有不得而完者矣然其徒以傳法為父子兄弟則長幼後先初不可紊其囿於聖人之仁而不自覺者歟異時親者疏疏者親其所謂霜露淒其之感事亡如存之誠往往又以清虛障礙之說自勝馬醫夏畦之子猶異子孫上邱墓具人心者得無少倣之乎哉明善張公

應元系出於儒早領玄教迨遊京師被旨授興道觀提
點以歸益用慮材繕治中外整飭遂捐已貲買田若干
畝入本觀供鼎仙焚修又斥其餘二十五畝有奇助玄
妙道衆半歲午膳予以祠事其先人願與茲山相為久
長庶萬悽愴若接於心目其亦知儒者禮經大意天倫
之愛庶幾少完焉後人見其祠而思其賢視公之祖父
不啻如已所自出則晨香夕燈歲時祭享毋以世遠而
遂亡其初則今日之捨田建祠者非無所為而然也住

持知觀事洪君天禧欲俾來者知作之所由始徵言于
余不敢以固陋辭顧將有以告于其徒者嗟夫父師罔
極之恩疇得而忘觀明善公之為可無憾矣然食其土
之毛而身得脫於公上之役若知其所事耶是宜相與
守淡泊去健羨期進於師之道焉公之意亦在是故余
得併發之書以為記

提調海運府什物記

航海以漕朝廷重寄也故割行省大臣以綱維之然宿

留再時凡供張之具率需諸坊隅參知政事呼圖克哈雅公不忍困民於是命通守劉某等謀之某遂捐俸以倡創什器若干事仍慮主者移易乾沒俾勒石示久遠夫器用小物爾公尚興惻怛則忠盡事國惠行列郡者從可知矣

滕坑族姪壁間小記

乙亥歲元侍先母程氏避亂山中後五十四年當天厯己巳夏五頃自吳門歸携耆芥二稚重遊世故紛紜霜

露交感夜臥小閣澗聲淙淙常如風雨驟至邂逅佳景
塵襟脫然審樂土之餘音享屠門之殘噉雖晚何恨青
山白雲當賞斯言

紫陽書院增置學田記

學校之設舊矣其教焉養焉皆三代遺法也文備成周
菁莪樂育洋洋德意為士何修而幸逢斯辰風教陵夷
羣居弗養趨為游說揣摩押闔迷本失真嗚呼斯文在
穹壤曷可一日廢哉歷炎劉而瀛而奎漸追古典至慶

歷則天下郡縣皆有學有田禮義浸灌河嶽發祥而七
大儒繼生盡啓羣聖開鑰幾復三代之懿我文公先生
其一人焉異時與門人高第陟降星墟卜居未果神遊
故都山川草木尚有餘耀今書院曰紫陽從先正志也
始創於城南隅則韓候補魏侯克愚為之也再遷南阜
則山長張公炳為之也百年舊制輪奐翬飛廩稍未充
延佇方來後至元三年郡守嘉議公浩善慨然自任命
天台楊某直學吳國英節縮浮費為市田圖歲會其贏

得錢以貫計若干既而教諭蔣某攝書院事與直學貢某積貲益加又得錢以貫計若干買田三十畝有奇為養士之助公勤懇篤至弗啻視為私家事前所罕有贊之者知事張侯為有力是不可無述元謂鬼財庀工以据高明凡隸于學者皆可居焉也拓疆增庾以食其徒凡以儒名者皆可進焉也孟子曰誦其詩讀其書不知其人可乎知其人者知其心也先生之書具在讀其書而知其心又以知先生集賢聖之大成也二三子其務

學哉公西域人果毅有力畧嘗為部使者用法平允方
大新孔子廟以雄特稱從事張侯三衢人由科第起家
以文行著于時履畝宣勞則程元道姚廷用張珽孔彬
孔榮也

歙縣儒學修造記

天下惟理最大古有是言矣故教修而理明理明而後
彛倫叙上帝降衷之心存焉聖人垂世之教行焉曰校
庠序者鄉學也曰學者國學也三代而上士遊於學故

人人有士君子之行三代而下士遊於客不幸而狙詐
傾側之俗成學校之廢興關乎世運之升降嗟庠六藝
燼而羸祚促太牢祀而炎運興創業之君鑒悟前轍嘗
有意斯文矣迨夫表章六經則邪侈禁而不行正配孔
顏則聖道彰而益大好文令主後先相望厥勲爛焉或
者猶議漢儒掇拾殘缺補亡信偽散失本真固當恕而
論之訓詁字義矣聽學者因句讀以自求詳定制數矣
後之作者有所依据西京專門之業未可少也貞觀疏

義辭累繁猥徒守故習愈磨愈昏必待關洛諸賢東南
大老而後能深探而力挽之如日星在天聖心始白於十
七百禩之下而吾鄉朱夫子是與焉觀其釋傳旨嚴如
經斷史繩以麟獲集賢聖大成洞視萬古淵乎微哉漢
唐以來廣學舍招弟子負不為不盛然郡縣之學賜書
頒田養育士類則自慶厯始至今浙右一區之校積廩
如山狡獪者因魚肉之邑學在萬山間猶恨屯膏視他
學最號單弱前乎此非倚席不講則假途在告坐視荒

弗弗思弗謀教諭趙某自吳興來敦愿好修久慙士論
天巧其逢舊尹懸車邑丞進義葉侯巴延攝判書提學
政奮然以修葺為已任其西自櫺櫳門堦而升為孔子
廟其東自門而入有池焉有橋焉以至正門兩廡論堂
朱子祠凡甕桷之黑腐者更之垣墉之缺圯者補之脊
者崇之窪者浚之塗之墜之丹之黝之神奇化腐功埒
作者諸生請為記且欲聞紫陽之垂法者元愚昧曷從
而知吁脫去凡近以遊高明立志之方也嚴立限程寬

著意思修讀之方也下學上達由是而知天明誠兩盡
由是而希聖至若一物一太極則深闢老莊過高無極
之非西江頓悟則深惡掃滅章句以趨西方之誕皆所
以扶植孔孟大正人心本於身施之家國天下裕如也
聖朝誕錫尊崇設科復古合一世而甄陶之豈私父母
鄉哉元雖老矣願與公等共勉之葉侯括蒼人確守廉
行明達吏事輔以文學令行禁止民歌舞之朔望命胥
吏駢立堂下聳聽講誦俾知禮義此豈俗吏所能為哉

惟我僚案二三從事之賢協贊攸同是皆宜書姓氏以
勗方來俾勿壞

汪氏敬義堂記

汪氏之先出汪芒氏其在新安則以忠烈為始祖焉東
城之隅喬木蒼然而仲達君居之仲達承先大夫之遺
址益自充拓大構厥宇据乾面離以敬義願於楣間曰
叟其為我記之竊聞孔孟之論敬論義皆本於易其散
在於方冊更僕未易數也文言曰直其正也方其義也

君子敬以直內義以方外吾夫子以敬改正者何居正則靜而專敬則動而活有味乎哉由是論之敬者守於此而不易也義者施於彼而無不宜也持守講學兼行並進直上而至天德為學而希聖希天同一機耳或疑告子仁內義外孟氏嘗闢之易之說得無近似乎曰不然義亦敬也孟子言義曰行吾敬而已仲達少而機警長益慎恭源流二千石之門蚤被三遷之教魁然一佳士也計君之構是堂也而有高明深覲之觀內營奧室

安安言言甘旨日陳有順無強其奉親也有道矣已而涼風佳日歲時珍賞良朋四面而至君必倒屣歡迎及升其堂則左圖右書前觴後奕初不待子之請而醕醇擊鮮畧無靳惜實以愛其子以求樂益也愛其子則延賓之禮優矣古所謂陶母之賢者其在茲歟其在茲歟吁一敬之持循衆義之所集也故以之而事親事長則庭無間言以之而酬酢羣動殆見無一之不當名堂之旨深切著明矣君其深思而力勉之哉先大夫德甫公

長余兩歲嘗於鄉校聯事有一日之雅異時受薦者言
出應時須提舉江浙財賦猶畱取而留贏以畀後之人
汪氏之興其未艾也廼為之記

一齋記

函三為一一為太極萬化之樞紐品彙之根柢也一大
為天道生物首元而為誠之通復者也鴻荒顓蒙為
吾始祖一人上下數千年子焉孫焉來者無有窮已猶
一粟至千萬粟也雖曰一為數始吾近之而不見其首

曷知散而為百千萬億而復歸于一哉易六十四卦重之十二畫是為四千九十六卦始於陰一畫而陽一畫水火木金土質生於地氣行于天百姓日用而不知於天一生水精一之傳寂寥簡短咸有一德魚水君臣洙泗一貫猶虞廷君臣告語也知乎一萬事畢淵淵乎深哉吾友吳寧之以一名齋益取得一以寧人法地也隱居里閭恂恂似不能言事母以孝謹稱友二季怡怡庭無間言以貲雄其鄉而驕矜之色不形嘗以拯施存

心延師訓子樂善不倦君子其人哉廼謂余曰子其記
諸余謂君大父月壺翁晚年修鍊勤至形神完厚類有
道者得一之旨其有所受顧余將何以復命則曰猶龍
翁言地之得一其合於坤之有元否耶人能體坤之元
地之一以靜為吾心之主舍孔門主一之敬吾將安倣
重簷宏敞風露淒潤君燕坐其中事無事焉固為可樂
若夫應接羣動猶不能挽此一則虛心遊世雖五兵吼
虎所不能加焉往而不浩浩然哉

筠軒記

吾家居烏聊山麓四世矣室陋甚猥以儒見稱然其可憾者四吾自知之先君子抱子遲暮生不迨養一宜憾少母齡雖高貧莫具甘旨二宜憾辛勤哺兒家累幾四百指而伏臘不給三宜憾蚤孤嬰難更事馳騫晚始知學而聖言浩若煙海常懼精力就衰卒未有成四宜憾頃來恒怯退避如畏蛇蝎思欲遵古人高蹈之誼而跡未超于流俗計無一可者夫以多憾之心而進退於無一

可之時是宜行而隱憂臥不安席其自處當何如亦曰
無可奈何而安之命也秋漏向永甕牖疏明霜筠萬枝
影落上下老夫於是時亟呼兩兒相與背誦聖賢之書
若鼓琴然彼扣則此鳴若撞鐘然機鋒所值頗解人意
如昔人負暄食芹自以為至美但未知他人以為何如
也須臾即枕夢一丈夫修幹玉立告余曰吾族素蕃碩
自黃帝嶰谷受姓以來不屑寵祿於人世少許可汝若
可教授爾虛中篇讀之可以練性除妄輕身延年迺載

拜謝曰謹受教矣曙分臨盟第五兒桂芳進楮墨請書
為筠軒記


孤也不天二十年矣披閱敬堂遺藁得筠軒記遂
請舒君道原題圖上宣特文字可傳一時範模百
世况道原斯文契厚足以相稱第不肖孤摧顏白
髮迫於老境不能孝顯為可愧耳是月戊申日南
至孤桂芳泣識之

棣華樓記

槐塘程氏宋相文清公之宗也有字仲庶者與其兄伯
原弟季高同居友愛因以棣華名樓樓成謁予請記予
謂兄弟之愛本諸天而脩諸人亘古今而不可改也夫
乾坤大父母震坎艮為男巽離兌為女非若兄弟之倫
乎在人以手足為喻者以其同衛心腹也在物以鴻鴈
為喻者以其不亂羣也角弓取其內相向束箭取其衆
難推至於棠棣則同幹相依有不相離者由棠棣之華
萼而推其本根則父母所當尊而同氣所當愛較然明

矣借使今日登君之樓拾級而上有兄弟先後之序焉
柱楹嚴正有兄弟偕立之義焉榱角聯比有兄弟密勿
之情焉牕牖之開闔則樞筭無異制也碧瓦之參差則
溝溜無異注也左圖右書晨飧夕酌惟焉以相接陶焉
以相語日奉怡愉頌荒迭奏以周公數千年不能一之
心而能究圖於公之昆季之門由昔及今而培護益密
英華日宣是紫荊之樹無可枯之年而棣華韞韞遂長
春之樂矣且公昆季皆人中英俊篤實謙厚知人緩急

萬一憑虛望遠其有見於荒野寒烟之際必待夫人舉
火而食者量力而周之民吾同胞之心大父母之心所
切切焉者也此孝友之所克也腐儒舉論濶疏如此請
槩與好義之士商之則元龍百尺干霄漢矣筠軒唐長
孺敬書



筠軒集卷十

欽定四庫全書

集部

筠軒集卷十三

詳校官庶吉士臣陳若霖

中書臣劉源溥覆勘

總校官進士臣楊懋珩

校對官助教臣胡予襄

謄錄貢生臣王時發

欽定四庫全書

筠軒集卷十一

說

余志賢晦村說

元唐元撰

上饒志賢余君嫉世之機巧銜鬻以自詡者故晦其村
以居之間嘗俾元疏其義元謂閉塞成冬雷在地復必
極乎嚴凝而後陽生焉東方未曙大星將沒先以昏黑

而後大明出焉故曰晦者明之母明者晦之子先正謂
無極以前為陰含陽元不始於元而始於貞意殆類此
易論箕子之明夷而得其用晦而明之義蓋晦於殷雖
為奴而不辱明於周而禹疇以之有傳武王之養晦與
顏子之龍德而隱因其時而為隱顯道何異哉計君之
晦其材為未足必晦其室焉晦其身焉以之寓於起居
衣服無所不用其晦焉是故居則晦於繩纓衣則晦於
緇垢巾則晦於墊角履則晦於下穿琴則晦於無絃壺

則晦於利缺無壹而與時俯仰又不知是間之山川草木其果甘於君之命晦而晦者耶其亦強承君之命號而兩難耶是未可知也詩曰昊天曰明及爾出王昊天曰旦及爾游衍是何天示人以昭昭而人以昏昏自處耶老子曰良賈深藏若虛盛德容貌若愚又曰大巧若拙大辯若訥與晦而明一而已矣吾故曰嫉其世之機巧銜鬻以自詡者其欲還其淳而反其朴志賢豈真晦乎哉

醫者孫仲仁字說

仁之為說舊矣儒者論醫書以手足痿痺為不仁最善
名狀此言一氣不貫於四體則壅滯乖張而疾生焉凡
天下罷癘殘疾顛連無告其將坐視而不顧歟抑將起
而救之歟然欲起而救之必在位有力者可為豈閭巷
之人可及哉故惟醫者為近甚如救焚援溺亦可以觀
其所存矣自古任生人之責在君相當是時民無大札
憂今稽諸岐黃之經是已後世誅求征役毫分縷析於

米鹽竹木問其所以活吾民者一聽其自為若秦越之
相視肥瘠者獨貞觀主視明堂鍼灸經而慨然有減於
鞭背斯庶幾焉余竊謂古今之號為醫四一曰神醫二
曰良醫三曰世醫四曰時醫扁鵲授禁方於桑君飲上
池水見垣一方人太倉公受禁方於乘陽慶五色診病
知人生死故曰神醫古者以一種藥療病即造其微如
屠牛坦奏刀而衆理解若開多門以偵伺之則恐非是
故曰良醫醫不三世不服其藥所謂醫門多疾者以其

收効者衆而信之者篤故曰世醫乃若揚揚驕氣偶值
時行招之不來益自珍異則又量其貲貨以為輕重謂
之時醫醫奚暇問仁不仁哉同里孫仲仁生於世醫之
門蚤得良醫之訣溫乎其容而確乎其言也不肆不詡
以自將不震不竦以求功與余交稔甚屢請為文而未
果顧仁之義大有不易言惟力行於藝業之中汲汲焉
有濟物之念起號之功豈容越人專美哉故為仲仁字
說以歸之

徐至剛字說

易論三才之道陰陽剛柔仁義而已故剛為乾為陽為君為父為善柔為坤為陰為臣為子為慝在人得火金之氣多而性剛得水木之氣多而性柔然剛不可偏柔克之柔亦不可偏剛克之而後成夫正直之德春陵周子於是乎又有剛善柔善剛惡柔惡之論無餘蘊矣孟子善養浩然之氣以直養無害即乾之剛健坤之直方大者耶吾友徐生從學於余且再暮矣尊翁敏夫府推

比執別山莊請為子易字與名僕謝不敏乃言曰生性
稍柔柔則恐緩不及事故行千里之途者志先立而後
氣益振計日以至焉是志為帥而氣為卒徒也請名曰
至剛而字直卿知乎此則善柔之為友色厲內荏之為
心者皆可謝去也以直自養而交於人者無往而不直
也夫剛不以義制則近暴直不以義制則近愚子去而
無少惑乎哉

汪信翁字說

碧厓汪公之季子國錡字信翁鄉先生嘗序其字矣余
近過其門以先君子與君家忝世交乃踵其門明日報
謁如禮復請為說謹不敢辭夫禮有器者必先其誠誠
為重器次之故曰苟非其人道不虛行其誠之謂乎錡
一也蘋藻之薦詩人詠之左氏又言之器也有誠焉苟
有明信可以薦鬼神羞王公與詩言有齊季女同一義
耳余嘗怪左氏論周鄭交惡信不由中堂堂天王下質
小國履鮮加枕甚矣何暇論其信與中哉先正謂丘明

以事論事不復尋究義理重可慨也雖然稽錡釜之用而達明信之本與黍稷非馨明德惟馨皆千載不磨之正論吁孔門以兵食可去而信不可去錡者食之寓也信者民之常也君家承學淵懿聞此熟矣其勉之哉

毒鼓菴說

聖人仁治天下瞿曇慈憫衆生其道一也而有異焉古者晝衣冠而民不犯使吾民畏法如避江海當是時地獄果報之說未之聞故推而創是說者自瞿曇始其亦

禁民之非而為善歸耶又懼夫人之不悉聞也於是以
諸毒塗鼓用曉聾瞶其使之八目著心而有所懲艾者
耶在易有之聖人行師毒天下而民從周官瘍醫用五
毒而疾愈彼以毒攻毒而去之而非蘊毒於中至於潰
爛而不收亦明矣嗚呼深山大澤有龍蛇之毒羽族有
鵠鳥之毒草木有烏啄之毒微而蜂蠆亦能螫手然善
避之則人無所犯而毒之尤者惟人心為然人心本無
毒也氣拘而習染焉故有心兵笑刀之喻奈何人不之

悟而疲津梁者深愛憫焉吳郡開元首座毒鼓余近識之而竊怪夫號之駭也曰吾師取涅槃經語而錫吾名吾教視之固其常耳上人嚴冷有林下風特徵吾言而余與之異教苦未究其義姑以見聞所及者復之雖然由致毒而實無所毒由聞鼓而實無所聞子之師言詳矣余何言哉

魏君實謙牧齋說

牧有字養之義故牧牛羊者謂之牧州長亦謂之牧坤

為牛兌為羊牛性順故牧者易制羊性狠故牧者難為
以至不齊之衆而繫於一夫之手其所謂牧者皆在外
者也惟人之生驕氣盈各氣慊忌嫉者志不廣好辯給
者言數窮而其用意與好謙者不能相通夫謙在我者
也能祛夫人之驕各忌嫉而辯給者也六十四卦謙不
言凶則君子之所自牧從可知矣蜀士魏君實今為吳
人平生好讀易一夕隱几而寐若有告者曰世人美稱
宜無踰謙牧子其識之乃徵其說於新安唐元元謂之

曰君為吳人讓之為太伯乎故古今稱至德異時延陵
季子父兄之所屬望而亟去之遂使宗社為墟是謙之
過而不能裁之以義也苟知謙為德之柄則事無過中
失正而鶴山之祖風不墜矣銘齋自警疇不謂宜

施宜之雅山說

詩有小雅大雅古者朝廷郊廟之樂歌也雅正也小而
宴享大而烝嘗皆禮文之正也在易艮為山艮有止之
象止為山之體止得其所則正矣故艮之初爻曰艮其

趾無咎利永貞釋傳以為未失正也然則山之雅者正之道也君子持身以正者似之宜之施君吳郡翩翩公子也別墅在穹窿山側有支阜曰雅宜山乃取雅以名齋宜以字行君早生紉綺而能去泰甚謙謙謹厚宜為吳產之良也抑聞仁者樂山山之體靜而有常其效可得天年之永夫詩之雅易之艮為仁者之資也名下無虛士君其思之

句容杜彬叔菊泉堂說

余飲間杜彬叔之賢而未之識已而稚子桂芳客授其門君以菊泉榜其堂而請余釋其義乃為之說曰嘻余聞菊育黃華異乎衆卉泉出山下恥混于濁是二物偏穹壤間何好之者為奇而樂之者不多見也子獨不聞採菊悠然而見南山者非晉處士乎自臨釣石而取深清者非蘇長翁乎悠然出乎無意自臨無與于他人論者美淵明為千載人東坡為百世士彬叔無而慕之可以知其為人矣抑猶有說菊曰壽客風霜凌厲晚益馨

香泉號清流石淨沙寒鏘鳴石竇是壽而清者夫人之
所願欲而士君子之所嘉尚也雖然侃母淑賢愛子剪
髮躬勞運甕自力功名其後有淵明則休官晏如恥事
二代老泉崎嶇西蜀辭駕風霆晚試一官位不償德其
後生坡公則風節峻厲高視九流今考二賢之所自出
甚不凡矣宜乎子焉孫焉好焉樂焉之不多見也固異
乎世俗紛華之悅成其身而不自覺也由是而知君之
尊生有道矣安處善樂循理以廣養壽之源定泰宇發

天先以造至清之境惟清故靜靜故壽聖言可法也菊
耶泉耶其假二美以自鑒者耶况飲菊潭而壽者有前
言之足徵耶吁余老矣他日或過君之門掇秋英於醴
醪分小杓於夜瓶試扣夔州以後家法何似彬叔尚肯
以刀圭乞我否乎遂為說刻諸楣間

汪璜隱兩峰堂說

吾觀天地覆載日月代明山川流峙寒暑更禪莫不以
兩所謂一故神而兩故化也易上經首乾坤下經首咸

恒雨也邵子論太極兩儀以上為加一倍法兩也同心之言其臭如蘭一人行則得友非同門合志之道乎下至羽毛鱗介咸知所偶植物么微枝葉相當猶有聲氣之可求者豐城之劍望夫之石其精神所通有出於聲氣之外者夫孰使之然哉吁魚山之艮聖人有取乎數千載上者則盈乎眾區又奚止乎松蘿天寶之兩山耶然究其鍾竒蘊異必不獨在於草木之靈金寶之藏而實係乎其人此吾畏友璜隱公所以名堂而亦何嫌乎

自任之重也。今觀其雄特莊毅，兩不相下，而羣峯俯伏，不敢少抗其為。海寧之鎮望，宜哉。公日為余言，將謀移竹二百箇，蓄書二千卷，置長短琴二張，茶爐酒榼，種種對設，棋枰壺具，不俾孤立。庶求以翼夫兩峰者，公且日宴坐其中，不知年歲之我加而老境之將至也。公兒古言：古文古行古，不媚時，好得魯兩生之義，其庶乎無愧。兩峯哉，同郡唐元與公同年生，相知最久，故不辭而為之說。

跋

題二子徐桂與張定夫漁梁泛舟圖

道義之樂無窮朋友之益甚大洪濤際天一舟如葉豈
非朋友之益遂忘風濤之險耶雖然苟明需有孚之誼
濡首之戒入乎坎者敦若出坎之為安也二三子其識
之

題太白圖

太白蜀郡人或曰山東人平生倜儻豪邁好劍術任俠

不自拘檢吾嘗評其為人如東方朔詼諧避世之流觀其醉卧溷迹於市人奴視高將軍而不顧存玩世不恭之意然武帝能容之而明皇不能用之也豈太白猶病於介而未若方朔之通耶困謫夜郎氣不少衰世傳委身自沈事與屈子異或謂其托水仙以自化誠耶否耶然其為詩閎肆雋偉沒世遺榮千百載之下凜凜然猶有生氣也

書程涪水遺范甥可起字說後

按爾雅母之考為外王父母之妣為外王母然則舅視甥若從子甥視舅若諸父以其同氣也昔人有以額類外祖者王筠之於素繁是已有酷似舅氏者何無忌之於劉牢之是已此特其淺淺者若楊惲讀司馬遷史記而頗為春秋李靖與韓擒虎論兵而嘆其可語孫吳可謂機鋒交值肝膽相照又何深哉世之為名父子正不多見况甥舅哉比讀鄉先達翰林洺水先生與彌甥范氏翰墨其以詩書之澤期望深遠傳至壽朋久而不墜

山前山後惟有清風無恙想分半席還肯借我茶具否
願相與談程范小葛幾世于茲岐黃之術與六藝並行
似不當為之優劣也

燕叔毅練江送別圖引

天地間流峙為山川今山川猶古山川也人生而寓諸
別離古別離猶今別離也圖本無係於別而好事者獨
先焉蓋有以攷其人之賢否與其交誼之厚薄夫豈苟
然哉練江源出鄣山東流至海經子陵之瀨直走浙江

是為江東大州古今文人達士來遊有暫數意緒有戚
忭不可強同然欲灼知其人之賢與其交誼之厚者因
圖而益顯其可少乎哉燕君叔毅自其少年已能奮筆
入科場科目廢格乃刻志吟咏聲流烏府用薦者言久
而不報於是親年老矣遂不擇祿置身刀筆與展所長
然恥徇時好所向不合始繇徽郡改調姑孰同志嘉叔
毅之賢不忍其去圖以識別且徵余言以贈其欲君張
之屋壁以寄異時無窮之思焉余昔遊宦道出青山觀

其鳬鴈魚蟹菱芡荷藕充溢于目天其假子以養親過
疾其驅可也伯羽仲羽余寅好兄也先公植奇石于庭
君其候問無恙念疇昔相從長橋之縱飲南潯之秋泛
步出地門行金陵市俱可繪焉而未遂其果少耶不果
少耶宇宙茫茫行者不息鍾情正在我輩爾吁

跋李伯時摹劉商觀奕圖

有如是松石磴礧物外境界也有如是衣冠對奕物外
散人也被褐翁惟知折薪初與何事今袖手旁觀似依

依不忍去者其未能忘機耶機心一露與伯時臨摹才
生勒鐵坡翁所題皆贅又使余不已於言得無重贅孰
若今劉商者持斧入林作丁丁太古音泯然於心迹之
表使大蘇公可作必賞余言為之噴飮滿案

跋樂天九老圖

同里清父蔣君出家藏九老圖示余俾贊一辭余展卷
三肅喜獲觀唐人衣冠之異且以浮屠氏蟲其間風韻
幽雅令人絕念世網樂天其領袖諸賢者與按公被遇

憲宗時事無不言湔剔抉摩多見聽可晚事幼君偃蹇
不合虞人之箴雖殫忠藎而新井之篇已萌禍機矣號
香山居士於摧挫之餘招胡杲諸人於引年之後然以
直言動前旒中人喪氣偉績著名郡惠澤旁流其在唐
史已不多見嗚呼賢矣哉其後洛陽耆英圖形於樂天
故宅而司馬諸大老莫不許其負志氣之高嘉其有緇
衣之盛或謂十二賢之會與九賢爵位有崇卑之異焉
洪範言壽而不言貴貴外物也清父曷以是而曉之

陸太初家藏米元暉山水

晉帖自唐陵出竹書自汲塚出與夫名畫出於忠義之家而人異之何也物由人重也里先達府丞陸公諱夢發字太初由科第而仕於宋平生善為詩博洽負氣槩虛谷方史君兄事之不幸奉朝命沒入蔡氏私田餉軍竟為鼠輩所殺承旨官其子無何而奎運銷歇矣去秋八月友人危君太樸乘傳下郡國蒐獵三史事蹟余嘗以盧諫議陸府丞二公忠義語之儻以入之殺青公死

猶生也所謂名畫者元暉筆也其賦七言太初筆也景山合人與物而兼寶之亦可謂好事之君子矣

讀魏公輔詩藁跋

僕生晚讀書未多近歲始得先正鶴山先生渠陽自齋等集閉戶讀之數月大槩其文根據六經而沈浸於關洛考亭之粹及閱奏議二大冊惓惓以理義忠懇補衮闕格君心宣止詞章而已哉然所作子雲墨池極論易玄同異後生晚學讀之惓然則其詩又豈留連光景者

所可仰視三世從孫公輔君頃會鹽官出示詩藁碩人
叙引珠光玉瑩僕何庸贅辭君詩清熟類多許可然鶴
山翁超軼絕塵獨融之以油然之理趣其家法猶在也
僕欲學而未能會還吳庠假尊經一榻秋高夜涼青燈
對誦益共勉之

題長洲尹王公晴雪圖

天下至清莫如雪騷人墨客類深愛之然長安貧者所
不願多見茅茨之下得無素生之居乎恤民禮士茂宰

事也長洲王尹留意此卷宜起敬矣

題赤壁圖

赤壁爭戰之地千載崢嶸想風蒲雪浪令人易生感慨
坡仙前後兩賦可謂能吐胸中之奇者其與周瑜乘勝
意氣不相上下此卷寫湖山景致特為嫵媚向使長公
作賦於此欲須江山以為助吾當三叫於其傍

洪存心婺州送行詩跋

親莫親於父子能則知教得則思與如耕者寸寸而孳

耨之切切而望其斂穫也有國者知其然於是開父任
之門酬勲延賞階升序進官無崇卑俾之盡悴報國一
而已矣里先達耐軒洪公尹東陽時奉大府要束更新
倉庾穹固嚴正官賦所儲至今賴之垂四十載而孫在
來主倉曹人語君曰官庾先大父所作君知之乎君起
而應之曰某不佞祇役于茲惟當夙夜警省求無愧於
先人耳居有間秩滿受代婺之士友葺詩以贈益知洪
氏有子能世其官者余為先大父令君托比隣好與令

考君潛齋公忝筆硯交生子如孫仲謀吾兒豚犬耳存
心屢執籌筭戰兢自持况日夜磨淬世學將懷利器見
知於明有司豈與區區廩委者比哉讀是卷益知其人
宏遠大之業在此而不在彼也存心其字也

皇甫德剛黃山送別圖跋

大凡山川之奇特不在乎通都大邑而在乎荒郊寂寞
之濱於人之所好者不在乎彈冠結綬之徒而在乎個
儻迂踈之士蓋由物之異者往往離羣而立於獨而於

嗜之深好之篤者可以觀其為人焉黃山去新安郡城
百里其神僊之往來龍蛇虎豹之詭怪溫泉之熾沸靈
藥之叢產其所謂茁茁金芙蓉者橫陳天際千岡萬嶺
皆所拱伏而予焉孫焉者也垂白之老或未能一造其
間但朝夕視其儀形抗遠思於埃壚之外不啻足矣間
有佔危而入如泐笮橋以行蜀道十步九息拊膺坐嘆
可勝言耶比歲趙仲簡歸姑孰里人洪生繪為圖以送
別今皇甫德剛之錢塘洪生又出新意以寫縑繆之情

好事者從而歌詩之徽水之源三如鴈爪分馳會郡城
下東赴浙江以抵海門然則挹黃山之水以釀酒材杓
黃山之泉以烹茗飲染黃山之雲以泚筆札孰謂僑居
非黃山之人哉德剛早出齊魯之邦氣習深厚來遊紫
陽之墟必得異聞為個儻識時之俊茂日即吾儒迂踈
者同其嗜好其無愧乎三十六峯哉因其請言之勤輒
書末簡云

題三蘇公小影

老蘇公面目嚴冷方作辨姦以攻金陵長翁忠義輪囷
熙豐不合元祐可以合而猶不合次翁宰績邑時為詩
三十六憂國願年豐之意如陽和著物胷中坦然舒徐
剛毅似覺不同古今人但謂公父子兄弟自為師友以
言語文章妙天下不知其節槩隨所處而安之子由豈
以苟免為一日之長乎哉

朱府君遺訓跋

死生一晝夜理也佛氏宗寂滅夜而不晝老氏學長生

晝而不夜惟吾儒有晝有夜是謂達生死之際夫知所以生而生之理順知所以死而死之理安既順而安非醉而生夢而死比矣然世固有杳然逝而精神不亂者千百無一二人由養之有素而深達夫生死之理也克用朱公先府君儒者也臨逝遺言所以自序而貽訓者用意至到結字勻整揚揚如平時可以觀其所養矣余因玩清苦二字而有得焉夫清則不汨於流俗苦則不慕乎輕肥以是自持則理義日明操守愈固舉凡天下之

榮辱利害禍福過乎吾前皆不足以動其心真傳家之異寶世守之良規也克用方承寵光來戍吾郡於講武之餘而不忘儒者之素業衆人慕輕肥以為榮吾獨以清苦自厲與布常無間然君之用志弘矣能世其家矣他日所至其可量哉

題羅郢州謨呂侍郎祠堂記後

吾鄉先達郢州羅公嘗為呂侍郎記其祠且謂得洞賔為二世孫益使人敬心惕然是矣然侍郎為州司馬利

祿不入于心乃能脫囂埃讀書水西郭外其高風雅韻
便可祠事百世初不待其孫而後顯也捨堂為寺官滿
而然其求福田者耶余暇日因携生徒兒輩摩挲苔井
而去

跋胡石塘先生贈章潤翁憶昔說

往時同舍畢生為僕言石塘胡先生議論風致高出人
表其為文倣先秦漢史雄深雅健莫齡益自珍閱不輕
予人蒙莊所謂驅龍之珠深藏于淵惟遭睡者得之非

有意於人潤翁之得於先生殆類是耶曰不然前輩文章川停岳積往往有所為而作亦以其人之可受而授之耳潤翁辭親遠邁將及周星比獲至寶以歸得無嫂下機而竈婢驚走者乎僕願識其人惜乎修文地下矣故重為嘅嘆而書以歸之

跋桂仁仲母壽氏貞節詩卷

驪姬夜半所私之言人所不知後世何以知之襄夫人匿愛公子鮑之心事所未形國人何為使之奪嫡一言

之辟幾至亡國一念之辟幾敗天倫猶諉諸欺心而欺人罪可容誅哉春秋聖筆所書宋伯姬卒且冠夫謚而書葬時伯姬年六十餘猶曰婦人之義傳母不在宵不下堂卒逮乎火而死與詩所載衛共姜誓死靡他者同一風節吾故曰春秋之志微詩之志顯所以為禮義之防一而已矣下視驪姬褻夫人輩不啻犬彘七子之母又將何顏面見我姬姜耶至治二年冬余始識桂君仁仲出詩文一通曰真節壽氏題詠且徵言於是引矚動

容而言曰未亡人壽氏枕夫君尸股而哭之言之心與夫告母以誓不相見之心之言仲尼可作當與宋伯姬列書而栢舟之詩不絕響矣吁

巴林龍畫題詠跋

夫龍靈物也能隱顯小大噓風雲激海水而上之世固有不得而見之者矣故比類為聖人而麟翁嘗以是而贊老聃氏嗟夫山龍見於舜服龍盾見於小戎此龍之為畫亦甚古也余竊怪上古至治龜龍游沼而海濱之

人龍挂於秋仲惟見髣髴若全體呈露則滔天為灾其
游池沼固未敢盡信今世畫者又能一一肖似於頭角
鱗甲間何從而得真耶雖然龍有豢氏則人得以擾之
固可褻而觀之矣伯亮蒙古氏暇日作此卷徵同志題
詠且請余為叙首余謂人不可得見之者神龍也豢而
擾之者可以烹而食之觀伯亮所畫噓風雲激海水隱
以自居得無近是歟

題廉守所得東坡遊赤壁圖

江山草樹雲石閱千百載而形不可變因人而榮多矣
然江山草樹雲石正不自知其孰榮也大蘇公文章妙
一世赤壁之遊人境俱勝後之畫史追其勝於毫素間
以極夫江山草樹之榮必東坡其人始識之此卷藏之
恒陽王家所托重矣

書胡氏家訓卷末

延祐丁巳余始識相之胡君於中表黃氏家觴行間其
議論秀發若決江河而東注也若摩旗擊鼓而赴敵也

既而鄉試回同舟促席讀其詩文侈而有制約而能紆
意其有受者焉後六年為至治壬戌之春俾其子泰初
出示先大父知丞與比部公家訓書為涪翁勸學後語
母慮二百言真世寶也名父子自為知己後先顯融里
人至今稱道之相之又能厲學飭行收其故物而不墜
厥家君子於是乎知胡氏有子矣因念總角侍先子嘗
以考亭遺子從學金華帖一紙授不肖令朝夕熟玩如
曰至某郡謁某官某丈某丈其進退必恭唯諾必詳緩

市肆母輒入重邪闇之戒濟川靜竢味需有孚之辭乃
知鉅人長德垂裕作則於先正知丞公壹迹合軌然不
肖茹哀餘三十禩異時授簡猶在篋間獨恨與時馳於
道不近故於相之重有愧云

安氏家傳朝服書于卷末

余家粗讀詩知衣服足章其身由上之所命者良可貴
也其在唐國風曰豈曰無衣七兮不如子之衣安且吉
兮豈非請命於天子者異於常服歟其在秦國風曰君

子至止錦衣狐裘顏如渥丹其君也哉豈非始為諸侯
受顯服而國人得於創見而驚喜歟候人之首章曰彼
其之子三百赤芾其二章曰彼其之子不稱其服是其
受命於朝者雖可貴而容有可刺也嗟夫農之於耒耜
工之於器械下至閭閻之小人勞形治生僅積贏餘尚
為子孫計況士大夫哉安氏為濟南大家世以清德聞
始由叔祖朝列公以緋衣傳之澹軒中議公再傳之京
推承直又傳之今丞歙邑忠翊忠翊實朝列長孫也三

世四傳不知幾何年然愛護彌謹觸手尚新視晏子一狐裘三十年可無愧也莊生有言有干越之劍匣而藏之不敢用者寶之至也今安氏朝服奕世有傳而用愈著其為寶也至矣後之人修德以為寶則詩人之頌美宜在君一門其尚勉之哉

題前徽守高公守拙詩卷

始高侯守吾州適與蒙泉許公相先後蒙泉魯齋許先生高弟也為政專尚寬惠居三年民大悅服時南邦內

附未久治新國當尚用輕典侯壹法公度與民休息故
微之人士至今歌兩侯不置口後三十餘年始識侯之
子於吳乃翁以守拙名齋其治微時固嘗得拙之用矣
漢世參勃諸賢椎鈍少文至吏言刻深輒斥去故能成
漢初之治今觀侯之為人殆參勃之輩儔歟此所以為
國初之賢牧也吁

艾幼清汝東樵唱詩跋

昔人有言讀書萬卷而不用於詩畏其義博而辭溢也

夫詩有別材本於性情觸物而發故曰言之精者為文
文之精者為詩然觀少陵言讀書破萬卷下筆如有神
益知學詩人肺腑非得古今灌溉理義融會則如貌枯
語澁於善養生人不類頃識幼清艾君授余唐藝文若
千卷俾校正上之儒臺喜其博洽多聞畧見于歌詩枯
者以澤澁者以辨其有本矣或者以幼清儒家而混迹
陰陽者流殆未知幼清者伏羲觀河圖畫八卦兩儀立
而陰陽具故八卦為萬世言天之原而六經百氏所自

金史卷十一
出然則幼清豈直為區區俗師拘忌之說哉吾非瞽史
馬知天道知天道之所以然惟儒者能之

地理李谷隱詩卷跋

古之人以賢愚壽夭貧富懸之天由氣稟有清濁厚薄
而使之然後世陰陽拘忌之說勝於是以壽夭賢愚貧
富委之葬地亦以地之偏正厚薄以明之懸於天者修
為責已委於葬地者去就吉凶係人惟吉凶求責於人
重而人之求償於我亦不輕雖有忠厚之人鮮不利其

貨而移其心如是則宜富益富而貧益貧柄是術者得
以私於人矣然事有不然以富人捐千金而求地何施
不可然亦有時而貧悴貧者送終或丐一席之地姑事
掩藏而其後亦得昌大豈盛衰循環而盈虛有常理歟
抑由修為苟契於天而後獲地之宜者歟抑其偶然歟
西江李谷隱比入吳過寓館論地理如禹導山川深知
脉絡故因其形見之方圓聚散以為取舍進退高下無
不中理視千金之家未嘗利其貨而移其心雖窶人亦

與之謀而不少各吾知谷隱之術行而人知避就矣故
贈以言

題張梅趣唐馬

畫馬止於唐詠馬亦止於唐曹韓之入神猶少陵之入
神也後世所謂唐馬者往往能逼真獨少陵諸詩歌橫
絕今古作者竟不得近似豈詩難於畫而畫難於詩耶
觀者當有所辨

常熟州徐仲立致爽堂跋

典午尚清虛厭煩局其人風度直超塵表故肥遯之士
聞而慕之然在當時公府賓主間率以此相高主之見
賓他未有及問在東米價賓之得主不以料理為務曰
西山朝來致有爽氣至視儒術清檢為鄙俗徐君仲立
以致爽名堂遠慕晉賢風度固非區區勢力可軒輊者
雖然君而今居仕隱之間其致爽固不難也猶當以心
會不可以力致致以力則如捕風追影不能詰竟會以
心則內而耳目鼻口腔體百骸外而盤盂几席琴瑟書

冊是皆朝爽絀縕耳異時君出筮仕斯爽既致融之為
清明志氣之神酬酢萬變發揮世業宜不暇與西山俯
仰矣僕方擁坐齋閣馭尋霜露猶懼其爽之過取也願
與仲立商確之

跋先君子梅癯先生講篇後

至治初年辛酉八月哉生明偶閱家中舊書得先君子
梅癯先生講篇論孟子浩然之氣特詳意其實序紫陽
書堂時也孤不天今三十年讀之凄然以悲元為童時

嘗錄先生詩詞作一鉅編中更乙未郡燬弗存他如理學諸文多所發明具載六典精義猶得為手澤也後之子孫寶之

題清之弟梅圖

先君子自謂標格爽朗號梅癯翁學者盛稱之年四十餘生仲氏復小字曰清喜其類已也是圖之作寄意寔深盤根直幹端嚴自持有父道焉旁枝傑出踈花相依有兄弟思焉諸君題詠日積然未有喻其意者余始發之

而淒惋甚矣孤根暖回生意不斷詩不云乎無念爾祖
聿修厥德子孫繩繩其愛護之

筠軒集卷十一

欽定四庫全書

筠軒集卷十二

元唐元撰

辭

倚山書院辭

倚山書院者程國寶之所葺也國寶先公平生號倚山
有嘉遜之志焉先是以枕雲名亭公圖書觴詠于是無
何迹與事遷人琴俱逝于國寶葺而大之更榜以先公

之號用寄無窮之思君子謂吉國公有後矣同里唐元
乃為之辭俾工者絃之以相春秋祀事其辭曰雲蒸蒸
而上浮兮公胡為而枕之忽中路而散漫兮弔千古之
餘悲山猶倚於杳冥兮欲觀之而愈達秋月苦而春飈
蕩兮但見孱顏與偃蹇何音容其靡靡兮念年華之易
晚禪嘉名以締思兮願申之以無倦奠桂酒而椒漿兮
延佇乎神之來返後有人其勿替兮撫斯文而悽惋

道錄雲厓蔣公哀辭

并序

蔣氏之先出自會稽為歛之始祖曰儼者因官而家焉
余生晚不及見衣冠之盛識景明號雲厓於老子法中
余食貧嘗客授歛南洪氏家景明遣猶子從學涼風佳
日輒命之遊登高望遠交唱迭和藉是以憫幽憂無聊
之思後去一二年遠或四三年過其鄉必扣公之丈室
而訪焉每見辱具酒茗香果留一餉極歡而罷既去而
涉幽澗並長林必為之凝佇以寄其遐瞻矧公於婦翁
聚秀老人締交厚善語及廢興存亡之感為之流涕公

於余平生之所謂愉佚悲傷勞悴偃蹇至情所鍾雖德業之異未為不知已也公年八十六而觀化其無愧哉或者序其出處以官污道是猶鑒其天倪而為真純之累耶余獨愛其老壽歸然高卧雄溪之南極三十年教其徒先論孟以明孝弟忠信為主本始及五千言與夫道家藏室之書故其宗門日新月盛晚益市田以膳其徒取其尤歸玄妙示不忘初世之庸夫以町畦自私者相去遠矣余謂雲厓向使不早孤不絕人逃俗亦必能

為宿儒嚴矩矱猶幸為黃冠師則吾州之有道而文者
實推公首稱其來也雲旋其去也風消吾知浩浩乎於
天壤間也故作哀辭以泄吾之悲以遺其徒其辭曰嗟
嗟人之生世兮其又何求較轆宇宙兮八方浮游走受
鞭兮汗服輶衆營一飽兮常包羞孰若斯人兮守故邱
左琴右書兮黃庭與儔爰清爰靜兮暑葛冬裘金石仰
觀兮滔滔衆流命既長兮譽又垂休人莫怨兮已則何
尤蓬弱何鄉兮物表悠悠謂生羽翼兮事實難酬舟有

心於壑兮壑無心於舟應盡而盡兮悟浮漚溪風瀟瀟
兮猿啾啾蕙帳空兮誰與留宣斯文兮垂千秋

墓銘

松江府判致仕呂公墓銘

惟呂氏遠求世序自師尚父始宋尤盛於蒙正之門今
散處於江浙間者皆姜姓所自出也公諱良弼字輔之
姓呂氏世為歙縣人蚤從余遊其所恒習方冊整齊若
手未觸警悟異常兒已而父即世俛習吏業未嘗一日

廢學初吏于歙邑郡更治浮橋人曰呂君甫執吏役不
苛於民而橋成將遂相如之志矣已而果然會省符徵
鹽絲絲非土產民憂惶不知所為公奮然請赴省卒用
折收泉貨民至今誦之遷廣德廣德於江東為下郡即
議修水利通灌溉勸民課桑木以為衣食之源轉嘉興
壤沃民富人有賀之曰君自今生理裕矣君曰壤沃則
賦重民富則事繁益自慎重衣粗食淡門絕私謁人笑
之曰吏役何用是耶竈亭戶視他役彌酷有司祇憑戶

籍定差歲久衰耗公白上官從富戶補充經理田糧東
南騷連公主海鹽州文案晝夜不寧幾滿歲月膳無取
於民增田必根故籍官賦以饒酒課浩大舊富戶名存
實空新富者負貲求避公力卻之從衆定論富戶包辦
公私克濟其理問江浙行省掾史也從省臺官馳驛浙
東整治盜賊奏讞平允民得無冤其弭盜方略體究民
情幽隱之中猶寓國家寬仁之意丞相首須之廣濟庫
失陷腦子諸物筦庫隸屬皆貧人雖破家鬻妻亦不能

償公上言均之賣舶貨家衆藉解免其為浙東帥閭掾
史也從阿都拉宣慰抽分番貨於泉州衆所啗利如飢
渴然公獨不為連從馬元帥鎮伏倭船於定海又從仲
嘉努鎮倭船於福清立法博易夷夏安之除將仕郎知
事寧國檢舉泰定二年以後未申除錢糧虛作實在為
數鉅萬即日申省銷破免郡計累和買赴北上供紙號
為民害徽為最宣次之舊比最下等估價既不恤民矣
况宣非土物轉販者並緣為姦公兩平定價日厯紙先

事移文令民預備公私便之有指強盜者以木梯為證
出為竊盜有指勒死以詐人者辨其辭異卒遇赦免除
從仕郎經歷太平前壓烏臺後臨憲府仕者重足而立
公惟知奉憲章而已御史過其境亟稱譽之歲收田財
賦及江西糧五十餘萬積附餘四萬餘石公乃合正糧
報省任事者絕私已之望矣歲徵絲綿令民親執權衡
自公立法始司庫者絕弊端矣分司公廨宋酒務故趾
有司歲葺以釣奇為貨議用官錢為定二百勸富室三

十餘戶撤而新之自門至寢室几席帷幔無不備完父
老刻之石姑孰江左名校田租有力占為世業積逋五
千石會尊經閣幾仆公為追逋完葺舊繪從祠歲久黝
滅公創塑像校官刻之石郡財賦額重姦民謾陳荒弗
公於未斂擠行令驗實公租無失繁昌等縣蘆蕩魚陂
官豪詭冒公議從工人佃種利及於民府倉海運糧米
庾人以高下手槩量致交擲瓦礫近倉民舍露立公白
官長與海道官較斛行槩遂得息爭運糧傭五日一給

宿弊一旦頓除公仕官二十年其於荒政尤所留意初
吏休邑即勸邑長立義倉九十六所積粟萬斛以備旱
暵調歉邑值歲大歉命主兩鄉斂富人粟七百餘斛以
活飢人二千六百口遷廣德行案義倉之虛耗者積粟
萬餘斛發建平官粟舊儲二萬餘斛鄉豪黨罷吏竊執
其柄惠不及小民即斷遣之浙東帥閩從元帥拜珠公
運浙西糧十五萬斛涉海賑飢時萬夫長所領士卒駕
哨船蚤午難制公日給糧糲約束不離舟次居人德之

在寧國日值飢饉公主施糜粥於僧舍貧民以次受餐
戒強暴攘奪廢疾無親屬給食養濟在太平日又值歲
祲建言以官廩附餘糧及海運顧舟羨價若干週之不
給申省撥官錢千餘定週之又不知勸率上戶輸米萬
餘斛鈔二千餘定繼之凡賑男女小大一十八萬餘口
民無轉徙吁活民命者得非陰德耶公早孤刻厲自樹
立為人惴惴周慎居官以廉自力家食告匱俸錢常以
聚書尊禮賢士劇談竟日無復顧慮後日計以故與同

官正直者居率相親附監郡某官貴出戚畹裁成郡政
多倚公公亦為之盡力在官時鄉里故人孤貧投謁同
案而食解衣以衣之謝去無不滿意垂代無貲於篋無
田於野亦無少悔憾于懷里之巧宦沈酣貨賄歸市美
田宅以自多者其人賢否何如也公既歿大火迫廬烈
焰而得自全矣天報善人不誣也曾祖某祖某考某用
子恩追封池州青陽縣尹母汪氏追封宜人公自姑孰
滿還北上陞徵事郎貴池縣尹明年春赴上忽嬰風疾

丞請引年授承務郎松江府判致仕妻邱氏封宜人子
某女某適周某某次適鄭某孫某今為某處倉官次某至
元六年五月某甲子歿享年若干葬城南紫陽山之原
銘曰孰不為學學既榮身孰不為仕仕優治人孰不為
分終以宴貧不曠其施遺愛亦均以疾懸車胡不百齡
銘以告哀驗于後昆

唐處士墓誌銘

介翁處士於余伯氏行也元己卯自金陵南軒代還伯

氏亦歸自番謂之曰古祭法重宗子家獨幸弟昆各強
健歲時之奠其來助祭乎於是陪盥薦既卒事舉燕寢
禮焉公始生三月二日與賤生日同奉觴往返意甚樂
也蓋自頃歲以來弟兄留滯他州歸而皓首龐眉兩門
子孫蘄蘄頭角意方來之日未艾也明年公就養于杭
嘗賦五言相問勞又明年而訃音至嗚呼吾尚忍銘吾
兄之墓哉公姓唐氏諱如介字介之號介翁世居徽州
歙縣始祖諱承昉汴京人守官于徽遂家焉至公十一

世曾祖某祖考諱昶考諱紹龍三世皆不仕而行義聞鄉里考君研經好古開門授徒簞瓢粗給意晏如也孫鉉蚤穎悟大父愛之手寫毛詩義成帙俟他日課舉子業時時携入城訪姻舊教以事長之理先是水火革命民遭俘掠公與兄純夫扶持二親避難學宮一日卒伍突入欲盡掠之後乃知為儒家免焉公年益茂忍貧苦學授徒村塾生計蕭然或曰吏術時尚也君舍方冊而從刀筆可乎自是始探討科條舉口成誦縣有大獄疑

讞資君勘治然持心寬厚不忍深刻志竟不干祿公家
故貧紫陽書院以公為世儒獲霑廩稍由此伏臘稍裕
極力奉親於後母尤篤母亦愛之不啻己產平生儉以
足用創置附郭土田經營屋舍修治墳塋培植竹樹歲
率宗族上邱墓以追遠焉鉉既就學從星源雲峯胡先
生永嘉山甫薛公皆明師也以故讀書明大義筆劄魁
然在諸生右科舉廢格勉從吏役初試于邑公曉之曰
汝慎之哉母貽吾憂尋補太平郡吏官事有疑者歸而

質之公憂始解以其用父命也公杜門讀書不入公府
太守華父賈公聞而敬之遣子就學郡佳山水未嘗不
共載以遊常慮俸入之薄托以持齋茹素以堅子所守
曰吾不能如陸生遺子以橐中金吾何望汝人為酒食
哉其後調番以江東憲府薦章上之行省選充理問令
史公又曰行省提封益大理問刑獄之源汝慎之慎之
挈孥居杭日引諸孫閱書市肆傷宗周之禾黍詢遺事
於故老久之則曰西湖水禍好溺人其來久矣思還故

里而未遂至正初元四月一日杭城災鉉時直于省鞠
問死囚連逮百餘人案籍山如何暇問及私室所居烈
燄四合公則告天曰某僦居家無聚斂不道之財天其
怜之有頃風煙退息而所居獨存人以為異公為人周
慎不苟言笑於姻族有恩與人交始若淡然無所迎合
退而知其言雋永人咸謂公長厚而有謙享年八十至
正二年六月晦日忽嬰心腹之疾翌日尚啓親朋書問
酬酢如常但不飲食迎醫至則曰不可救矣日晡正衣

冠坐于正寢杳然而逝杭人傳以為尸蛻云妻孺人汪氏先公一年生又先公十年死溫淑靜專絲蓄粒聚經理其家如夫之志孝養舅姑姻嫁子女合宜男一人鉉女四人長某適提控案牘楊至餘皆適人早亡孫男五人曾孫男三人將以是年八月庚申祔葬于紫陽山祖塋用治命也孤子鉉自為狀來且曰惟叔父立言必信葬而不得叔父銘是無葬也既受命慟哭重曰處士當早歲孝謹克家而得為令子中年恂恂居鄉以謙默約

敕得為善人晚而極力教子及見其樹立所恨者廩祿不能逮及其親持是三者以居世於人道何憊哉雖無圭璋朱紫之貴是亦榮矣迺為之銘銘曰才足用世識臻至理肥遯而居善保終始義方之教庶觀有成仲作銘詩以永厥聲

銘

蒙齋銘

星源存翁鄭公於余為丈人行後三十年始識

其孫某以蒙名齋來請銘銘曰

乾坤定位屯反為蒙蒙而物穉昏闇未通其蒙伊何下
坎上艮山下出泉載清載靜惟泉始出未知所之遇險
則止時中自持孰導而前為江為海動焉有括貽茲吝
悔吾人之生天賦厥衷心為靈府萬善俱融惻隱無形
未見孺子靜存於中性其全體達夫已形精察無慙童
牛壯趾泉達火然哲人研幾寔先養正善保純一終焉
作聖曷云果行果以勇言曷云育德育以仁存内外交

修毫釐靡失惟仁惟勇作聖梯級彬彬學子朱里之英
以蒙名齋先覺是程嗟余晚學往昧童訓庶厲餘勤大
義焉竟

新井銘

奕奕新井渟涵固密度土攸宜中庖匪遯是雅是鑒惟
工惟力工積二百測深則石水由地行功自上出程君
伯仲天性孝友相國餘波霑濡既久庭無間言溫恭是
守汲之大來裕資百口雲仍浚清昭示不朽

家藏硯銘

予家藏硯四世矣度僅四寸許橫如度三之一仰平俯
窪側視若丸然予平生無他好服食遊息文字間故常
與之俱硯億吾髦吾與硯髫無相辱也故常稱其質剛
理柔溫絕無燥色類有德者吾祖愛之吾父愛之吾又
愛之迨吾兒曹保護益謹吁其亦有所遇者夫雖然世
有千金產必遺子孫泰奢慤惡視吾硯異矣或一再傳
朽不旋踵焉況四世矣是宜銘銘曰跡混瓦礫道何卑

兮貴比珠玉豈求知兮惟其自全是以能傳

筠軒集卷十二

欽定四庫全書

筠軒集卷十三

元 唐元 撰

鄭震父資深堂贊

自得之學由益而彰所資者深愈出愈長始由心悟履
若康莊如彼積粟有千斯倉如彼植木連林蒼蒼隨用
隨足顧比探囊惟茲書燈再世耿光得為已有幽貞永
藏久蟄斯奮我車我航在昔陶朱治生有方助邊卜式

爰拜為郎我其噬膚彼淺易量歸構吾廬椽桷煒煌居
仁之宅惟義是彊養爾靈龜永世其昌

吉雲贊

水土輕清之氣下生於地上浮於天非煙非雲郁郁紛
紛是謂卿雲殆為中國聖明出也至正初元歲在辛巳
日在戊辰時在未申之間黃道按節欲側未傾唐子步
於庭外廼視寥廓凝碧蕩銷氛翳若翦衣剩綵落落勻淨
若魚龍透浪甲次鱗集若浩劫之圉琪花玉樹磅礴巨

麗已當飄落投軒委陞上界僊官怡玩良久不散俾下
土之人俯嗟仰惜目睽神駭雖辯喙不能道神變絕藝
不能模彷彿第唐子曰異哉吾所未覩也按雲氣出江淮
者正白其青潤蔽日於西北主舉進賢良今攷其色初
白輒漬微青地屬大江以南而指燕代之域賢良之士
其際文昌之運而彙征歟稗官小說古所不廢宜上之
太史氏乃作贊曰山川氣騰為雲為衣翦之裁之天女之
機爾神駿奔捷出現詭冠日依霞吉祥止止

題淵明小像

晉俗薄禮教公則以彌縫使淳歸之魯叟輕倫類則遣
一力與子而令善遇之酣麴蘖賦止酒篇以見志典午
有是人哉今觀小像其不忍義熙而書甲子之意鬱鬱
在眉目間三季以來信不多得吁

題朱仁仲小像

今人今服內保真醇膝然其視頎然其身謂為仁仲耶
屢扣之而不見荅謂非仁仲耶則既呈露乎毫端之春

是為主靜之靜求仁之仁庶無愧乎儒紳

題巴林水墨龍虎圖

噓雲而興澤周八極成功不居寒潭畫寂奮威利爪百

獸莫當風低黃蘆慎汝行藏

巴林蒙古人有畫龍
題詠卷余嘗為之跋

太原王才塑工贊

夫繪事古矣像設焉非古也金鑄木偶焉古矣土焉非
古也尸法不行於後世自眇竺鬼神之說勝之也嗟夫
日月星辰之為服龜蛇之為旒龍合之為盾以至圖形

求相斯繪焉而已太廟之金人芻靈之易備斯金焉木
焉而已攷之尸法為祭物有異數禮有異時固未嘗數
數斬於鬼神也是前數者古人特寓於制度警戒求賢
之間而非像設之為後世五祀社稷之主無預矣呪誦
喧呶金帛雜施而求為福田利益者比比皆是宣古所
遺巧而今之為技因時出焉安知楊惠之之徒不再生
於僧繇之門而殆猶過之者歟余聞塑畫同出一法皆
足名家近世中州塑工精妙遠甚觀其飛土為像切中

絕墨殆與承蜩弄丸斲輪去壘同一工巧余方欲識其
人而未獲適吳郡府推張公告元言曰太原王才字大
用是其人也天性機警塑技實超等倫則凡風雨明晦
陰陽之慘舒喜怒歡怨情思之通鬱壹發拍掌故能做
百物窮象罔意之所詣磁針脗合其大而為天人為聖
為賢為佛菩提為金剛身小而為霞為雲為弓劍為鈴
鐸翔而為鳳為蛟龍馳而為獅為象為馬變而為鬼為
神驚心怵目無不曲盡其妙然後知大化生物之心亟

探遽取不可殫詰彼其進於技一至於此亦神矣異時
仙宮梵宇以其像設巨麗飾以金碧熏以苾芬佐行其
教往往曲意迎導流盼羣工莫與爭能豈偶然哉余又
聞前世綜核名實至于技巧工匠率精緻完好其由上
之所化人人各自為意毋庸苟且明如離婁巧如公輸
相傳千百載之下不與草木就泯王氏其登茲乎昌黎
公為圻者作傳子厚亦作梓人傳於昔有徵乃為之贊
曰兢燕山之陽是為長春其俗果毅爾性其純埏埴作

器本濟吾人藝精一代為鬼為神鬼神伊誰明天地性
方趨二氏羣蒙歸正孚顓假廟俾民知敬藝諫時須旁
敷厥聞

桂巖上人贊

井序

瞿曇老子好居旃林至間諸妙香而得阿羅漢道是香
於高僧大士每有利益異時論色聲香味觸法為六根
之累必極於空空而後已何哉蓋學佛人塗耳目去愛
戀始能不墮邪見而入於精進之地則是香又或為法

身之贅者非耶大抵吾教於視聽言動先察其法不當
為戒謹甚嚴則塗耳目去愛戀而一至於無者固異道
也常熟之慧日院有僧秀號桂巖取旃檀林之似而有
志四果聲聞之教則世之所謂花之最清者莫桂若桂
而巖焉固其所也竊意上人間是花香如驚風飄瓦不
墮染著由有至無如醎水入海如堅冰沃日始聞諸香
而實未聞諸香初不知其孰為巖而孰為桂也乃為之
贊贊曰惟旃檀林瞿曇之家吐廣長舌天女散花一絲

勿桂漆著皆邪天香石橋仙耶佛耶

祭文

南軒先生忌辰祝文

惟公學傳濂洛道貫天人義無所為論至精純切深孔
孟洙泗言仁友我紫陽德日其新位既尊崇澤加於民
天生賢哲存順歿寧百世之師陟降在庭以妥以值祗
薦于馨

朱文公生旦祝文

恭惟先生追濂配洛孔道愈明至言鑿鑿讀其遺書是
稱先覺永懷初度鍾英河嶽斟泉登觴采菊盈握神其
歸哉九原可作

金陵祭楊待制文

天高地下今來古往人品不齊事亦鞅掌嗟生死之一
途雖賢智而弗爽惟賢智死而猶生蓋以其道長行於
穹壤余謂封君之貴者無文章之足放苟天假之以良
才亦罕踈期願之享其或侵尋乎槁頂率忘義命而何

仗身當退而留祿竟亦纏綿於世網是皆平日見鄙於
先生之門而先生則凜然貞節皎行宜引日月星辰而
直上者耶是故論公之學識則胸貫上下數千年之利
害是非邪正灼見乎君子小人之情狀讀公之文字則
摘華發藻其動如雷力掃齊梁之纖靡可與賈班而繼
響昔公之筮仕也起家於文字鼓舞紫陽之士氣每不
遺於闕黨及其入憲府也夙負埋輪之壯志事出順動
而非強三為主文省闈高尚士拾芥於功名由明懸於

鑑賞儒臺清峻大施教條吏絕為姦士得所養公之譽望愈積而愈光公之文章篤近而舉遠是以聖明天子為之動容滿朝公卿為之稱獎命掌帝制以無慚重涉關河之沆茫古宣擅清涼高輿之懿名曾不若秦淮遂幽而寬敞歸休引年築室而藉耕大寒不出墻戶而塞向巾車夷猶里尊輩行門攢車馬以問奇室列琴書而匪長間儀嬖壽而作朋二子俱官而用壯夫何厭世溷濁而弗居忍俾海內諸生而歛望嗚呼哀哉公在新安

適丁父憂東城倚廬候問日脩公仕浙右化民魯鄒解
印而還蘇臺艤舟使者命前釋我羈愁贊以銅彝手弄
綢繆來鄭公鄉遠迎道周僕晚而仕千里悠悠見公金
陵我老可羞恤我沃我勸我淹留於儕輩中見過最優
銘父墓文佩服琅璆旁觀忌嫉亦衆其咻迨我東歸寒
熱靡瘳傳聞訃音已迫深秋嗚呼哀哉昔僕之識公也
恨不早及從公之遊也旅進旅退不能忘父母之故邱
其歸而復來也靳一言以自壯何殊乎跛鰲之登山而

追逐乎驛驕豈期始疑而終信嚮風涕一而莫收孰為
鬼而為神恣是慘酷之陰謀先生其果逝者耶吾知先
生之精神默運與造化者侔其蕩蕩乎為祥雲甘雨將
變之化之為膏澤而滂流其靡靡乎為良金大寶深藏
下土而奇氣不可揜者見之上浮計其昭昭者決不昧
特惧夫隱顯出入而難求哀誅投一二於千百斯為巨
手筆之贅疣醜清果甘無有底羞公知吾貧庶無我尤
哀哉

李晉仲讀之謂高古痛快當於古人集中求之

告祖先

筮仕殊早中更淹滯年近六十始錄吳庠不十年間三
領省檄已而拜一命之榮矣吁仕亦何貴夫蚤同儕既
榮而殞亦何恨夫遲桑榆容有餘蔭惟我祖宗睠其皓
首恤其清苦毋損其聰明俾不弛於脩讀其終相之

吳學祝文

聖道至大孰敢言喻師表萬世用開太平惟吳大藩藐

焉分教是慚是懼先聖尚默相之

諸賢祝文

惟賢哲不世出上下輝映數百年間聚精神于一堂之上俾為士者永有依歸幸孰大焉某祇役宮牆辦香告至惟神寔相斯文

范文正公祠堂祝文

惟公秉忠孝上契於天心置義田風厲於百世先儒論宋朝人物以公為第一流吳之士子廬焉食焉祠而奉

之禮也分教來此敢不祇敬

代甥方真佳為祖考妣八壙文

惟生事祭葬禮之大經先子偃蹇終身未遂斯志死不
瞑目孤孫甚痛之上賴祖宗之靈得先妣姻黨主簿劉
公慨念吾祖考貢元之喪在淺土四十八年吾祖妣亦
三十三年為書勤懇致伯父中全邑宰荷推旁親之仁
賙麥舟之惠以至治辛酉十月丙午合葬於問政山汪
村之原嗚呼吾父之志遺諸孤諸孤之志實托二三伯

父時之曠久事之難易神之監矣永安厥壙福我後人
冥報之貽諸伯父者敢為吾祖圖之

平江路祈晴祝文

吳號沃壤尤瀕沮如國賦之儲咸在而海漕資焉秋成
之際所冀晴明則穰穰滿家官民裕足頃者靈雨不止
嘉穀萌芽成功有虧惟神其憐之亟斂陰靈廓舒霽色
則民食不匱吏責可逭用是走告祠下以徼惠於神

雜文

漢文帝不受千里馬詔

昔西旅獻獒於武王時年八十矣拳拳作書告戒如
調護嬰孩其曰犬馬非其土不畜不寶遠物則遠人格
所寶惟賢則邇人安朕甚嘉之今郡國以千里馬來獻
闕庭凡馬自八尺以上為龍傳記所稱非方物而受之
是重吾不德也朕賴天地宗廟之靈四方無虞深居九
重出警入蹕將焉用之其復還其國遣使具為令布告
遠方毋令復入關者燕昭之世買馬首以致賢士此戰

國夸誕之風非先王之教也朕無取焉

本路勸農文

欽惟聖朝以寬仁治天下以務農重穀敦化原曩歲頌
德音減天下田租之半歌謠載道以頌太平况臘前瑞
雪應期豐穰可卜郡守以勸農署銜擇日出郊非徒循
故典所以劭農也夫農者天下之本有國之急務古人
云一生之計在勤一年之計在春是時不可失也徽介
萬山山多於田非他郡田連阡陌比往往梯山而耕尺

馴而不成一畝又以溪高易涸乾旱為灾民生其間勞苦太甚郡守視爾農多艱困常思欲寬征輕徭俾生爾父老歸而督子弟治爾耒耜則器不鈍浚爾陂池則水可潴正定疆界則隣息爭依時蒔種則物性遂且衣食足然後知禮義今天下郡縣有學鄉社有學門塾有學皆立教法使人趨善而避惡也爾父老重告子弟曰父慈子孝兄友弟恭則家道肥男耕女織不事游蕩則衣食裕毋賭博縱酒食以破家毋犯上許陰私以敗俗闢

狠違法者傷身欺詐反覆者致禍皆爾農所當戒也今而與爾父兄念老守之言朝夕無忘無怠則醇風盎溢善類汪洋雨順風調五穀蕃庶守之願也爾父老之所樂聞也可不勉諸

大成殿上梁文

伏以夏曰校殷曰序周曰庠司徒掌邦之教夷之清惠之和尹之任孔子為聖之時巍巍號帝王之師浩浩配天地之大睠茲新安藩屏之國是為文公父母之鄉宗

廟百官大備其籩豆有踐之禮宮牆數仞凜壓於風雨
震凌之秋南渡始創經二百年前守增修又三四老惟
聲教漸被於承平之日適事會將迎於起仆之機齧蠹
掃除良工踴躍恭惟嘉議賢侯太守作民師帥為國著
龜樂育游歌學子遂菁莪之詠躬先勸相蒿師來楠梓
之材勇猛承當非常事業載惟廣文靜遠博士甫里苗
裔東吳儒英掣電奔霆立諾不停於頃刻揮金如土成
功豈讓於他人光前絕後繼於浮溪舍舊圖新書于堅

石執斧者右執鋸者左方勤指使之勞如鳥斯革如翬斯飛甚便觀瞻之侈合榱桷棟梁而山積兼治陶甃甃以雲屯儼臨七十子於前楹遠續三千歲之正統益文王既沒寧不在茲乎自生民以來實所未有也匪兇何貶於吾道鳳兮宜復於東周斯人庶知鄒魯之風來者不忘河洛之績昭昭乎王者之服袞冕有嚴潭潭乎聖人之居溪山巨鎮間架旁增於殿陛規模遠獻於倅圖玉振金聲拱竢大成之雅奏春祠秋享祇言惟德之馨

香著策司祥虹梁肇舉默助神明之力式聞邪許之歌

拋梁東 赫日當天聖教同鴈爪水分趨歛浦花

屏山遠護儒宮

拋梁西 簷牙上與斗杓齊郭東門外瞻奇額鄉

黨篇中記執圭

拋梁南 香火專祠祀晦菴濂洛真傳元的紫

陽高聳尚潭潭

拋梁北 九五乾剛莫皇極車書混一古來無禮

樂薰陶民作則

拋梁上 萬里青天堪仰望
文昌芒色正分明永

屬聖師尊素王

拋梁下 孰使乾坤長不夜
道心炳煥如日星文

運流行貫華夏

右伏願上梁之後經學通明士志高尚真知實踐由仁
義以正人心立孝移忠卑功利而崇王道體認賢侯之
勸學懷思郡博之輸貲罔極恩深追慕綏來動和之妙

化行俗美丕變風聲氣習之殊侯度增榮賢良輩出兆
民賴而一人有慶大道行而天下為公

父老告社驅虎文

嘗聞禹鑄九鼎而俾民知神姦益焚山澤而禽獸逃匿
是先民為之防故居行無凜凜之憂民生斯時得非幸
歟後世官有常守以事情不切于國計者委諸神是神
之責輕于古而重於今苟神其顧之則民賴以安或黜
其視聽而不見恤焉吾民將若之何田農告里之父老

言有虎涉于河以逼其民之居者朝視其迹盤盤焉場之麥躡焉圃之蔬蹂焉吠者却走聆者股慄神既知之矣借曰神處幽而弗顯聞可謂知乎間焉而不力捍而去之可謂勇乎今里之父老與神約三日神其帥麾下倍程疾驅以出境土歸穴乎大山長谷之中則戍祀潔蠲式歌且舞以為神娛又將永永有飲食否則為神羞神其知之明勇之決母曰昔之負河而去其事在守牧而不我與焉於是父老竦躬屏息再拜于庭重矢其言

曰有不知斯言者如師溪白水敢告

與曹德昭御史書

僕曩以淺陋脩負南軒於山川得觀覽龍蟠虎踞之形勢於人物得親炙繼學夢臣二先生之儀刑稍遂結王生之襪執太史公之鞭於文墨議論亦得從容侍于左右得一言以自壯矣當是時閣下方以宏材碩學力贊臺網席先公不賞之勲庸重中州人物之妙選掃門晉謁不知其幾投贄五言承曉之曰此選體之餘風也中

丞相公詩集刊成嘗獻古詩錦四章承曉之曰老成之
製作也贈行大篇深厚純粹所謂歐陽子之文不見於
世二百年矣時時發視之尚覺光燄生楮背兒子遠遊
持去諸名勝見之孰不曰汝父嘗辱德昭先生前被如
此若曰嚴挺之有此兒在僕草芥耳何敢望何敢望伏
惟閣下首烏臺薦揚致清朝簡注姑繇元幕旋邁崇班
糾察百司風采振動東南半天下欲沾潤澤以蘇凋殘
者莫不翹首跂足以觀神化惟閣下心潛世訓目熟朝

儀庖丁牛解於衆理郢人斤運以成風宣上德以達下
情公之志也蒼生之望也小稚桂芳依棲宇下久矣近
得家問極荷提挈尚冀援之清波東睇文星燿燿惟昕
夕盥手焚香以祝德人川增之壽人來儻示一二字以
榮遲暮且令子孫珍藏如楚珩琨玉焉幸甚幸甚

與孫幹卿書

元不佞以儒為業先世嘗領鄉薦與故宋相訥齋同榜
而功未竟意謂餘澤粗存於是兀然而守書燈有年稚

子桂芳常在側焉朝廷用儒由直學始例徵弟子員其
後市井之徒携重貲自獻而執柄者魚肉之遂俾儒流
退聽亦吾道一厄也所可喜者今更甲令矣後至元中
元承乏南軒長入金陵謁繼學王公夢臣張公一見極
加禮遇久之稚子遊建業承御史德昭復禮弘政三數
公薦入閩南夫邑教微職也崇庠冷序也誠不自揆獲
登拜於大人君子之門閣下方以雄文卓行名重當時
三徵七辟不肯俯就吾兒小子乃蒙眄眷延之西賓灌

溉熏蒸皆仁義道德之懿何翅夫八芝蘭之室立金石
之懸也茲蒙寄示妙香盈奩前者又蒙賜監郡書屬辭
用意尤為至到區區父子何修而得此於相公哉溯風
懷感何日敢忘稚子在職滿還皆相公始終造就之力
也予日望之元亮先生儒林巨擘茶次幸斥名末由躬
侍几席惟冀珍誌為國自愛慰四海蒼生之望不宣

賀見夢臣張侍御書

夫天地至大也一氣之所同貫也故氣之所貫可以透

金石通山澤一寸之草與千尺之木同其榮一滴之溜
與江海之大同其潤蓋形有小大而氣無小大物有精
粗而理無精粗莊生所謂齊物物本不能齊亦以其小
大一氣之所鍾一理之所命故云耳且夫風雨之所會
晦冥蔽山谷揮霍動天地其勢力非不赫然大也而一
蜉蝣之微則知雨之將至而紛翔一鵲之細則知風之
將至而卑棲故易曰同聲相應同氣相求釋者則曰聖
人通天下之聲為一聲不見有異聲故無一聲之不相

應通天下之氣為一氣不見有異氣故無一氣之不相
求至矣哉斯言也吁王公大人之居世則甚超也其量
廓而無外比天地於物無不容其勢力奮迅比風雨於
物無不披拂而沾濡之世之士一聞王公大人之門則
畏其大而不敢進苟進矣復畏其大而不敢言苟言矣
復畏其大而不敢盡其情此亦無怪其然者後世公卿
大夫不下士久矣見一丞簿尚作難於皂隸况王公大
人之門乎伏惟侍御相公閣下碩學宏才大魁天下兒

童走卒知誦君實聖天子方以孝治垂拱遴選耳目重
臣畀之以激濁揚清之任十道嚮風百僚屏息儒生趨
起而不敢進者蓋有由矣側惟相公閣下以謙撝待士
不以已長退人雖小物不違天下之士皆知之故僕輒
進天地風雨之說以求達於左右惟相公進退之

夢臣先生讀之曰作手作手

論近世喪禮

自浮屠十王之說興而天下無無罪之親自七七之教

行而天下廢斬衰齊衰之服是何待親之薄耶吾求之古矣天子祭天地諸侯祭山川大夫祭五祀士祭其先是故吉凶必告有疾則祈後世諂事鬼神淫祀無福余兒時猶見先輩執親之喪終三年服漆布巾者近來不滿小祥易素為絲習俗之變士大夫亦恬不為怪矣里人大祥親友助以鼓吹殊不知凶經在身遺哀未忘孝子何聞樂音耶昔魯人有朝祥而暮歌者子路笑之孔子以踰月則善其中道乎

舟喻示兒桂芳

日遊吳會買舟江滸篙師嗜利而好招人也偪仄委瑣
坐卧弗舒炎煬上壓沴氣下蒸不嘔則泄同舟之人懼
焉晚泊馬目山下貸舟老叟大可容千斛深房高榻枕
簟悉安余始知善用大者不知其為大而器小者自不
可揜也汝由是而知務學矣浮躁淺露其量幾何深藏
不市而恢乎有容者君子之道也作舟喻示第五兒桂
芳且將以自箴焉

俞中齋刊書集註裒助疏

五十八篇備載帝王之治道三千餘歲相傳精一之微
言能於典謨誓命之文若覩遜讓征伐之事功非苟且
見豈尋常昔晁錯口授於伏生義猶難究而伯恭道同
於朱子見謂猶疑俾聖心日月以重明宜學子星霜而
屢易惟我儒林耆宿雅號中齋老抱遺經每依外傳金
猶靡顧有五月披裘之風園亦不窺守三年讀書之志
浩翻煙海久積寸銖因成集注之編傳示諸生之誦擬

新刻梓自覺慳囊好事而有人得道者多助明科斗之
絕學不在茲乎為蔡氏之忠臣是之取爾

賦

六藝賦

邈予生此東陬兮塊天質之慙醇憤大道之荒塞兮濟
聖涯而無津湫太素而刻畫兮汨浮文而淪真眩纖巧
以為智兮委古制而遺珍慨羲黃之遠去矣兮儼湯武
而孰陳考六藝之本始兮盛行於姬代養顓蒙以聖功

兮設梯階而前待紛吾髦拂而昧所知兮夫孰外馳於
華彩若童牛而加牯兮柅情波而寡悔仰前修之遺則
兮豈重吾之欺詒曰禮防民偽兮吉凶折而賓軍之樂
以和夫性天兮聊獨舉於咸池升堂計耦以偕進兮粲
爾參連而井儀逐禽以左膘兮御驅逆而先馳書記事
而數紀物兮撫民生而有為余固知幼習而壯行兮乃
遵吾之先路由委巷以達朝著兮束筋骸而履素歌二
南之正音兮又申之以幽雅而告具中多雋而不侮賢

分剗四鍬而如樹御馬正而調良兮固羞言於詭遇彼
同文而壹志兮稽竒贏而助賦夫何轍東而暴繼兮覽
餘燼而靡存聃竺荒而申商刻兮復厄訓詁於專門雖
稍拾於缺殘兮獲壘洗於盎盆嘆耆舊之白紛兮猶莫
探於本根吾小子將何述兮遂潰騰而遭屯被髮於野
祭兮羌殺烝而莫辨諧黃鍾於賈鐸兮顏赫渥而舞萬
塗膏脂於草莽兮禍彌增於革貫襄琯登戎以敗績兮
縱堅韞而瘡瘡斯篆出而隸亡兮間架毫芒而握筭余

登高邱而騁目兮收涕泗之浪浪揭牛尾以高歌兮擘
岐山之鳳凰母哀曩昔以若仇兮曷不徵禮樂於廟堂
拱神都於燕冀兮亘八紘於康莊校藝文以網士類兮
吾將游帝里而觀光

擬騷送盛則賢歸越


若有人兮乘長魚雲旗鬣兮髻為車令馮夷兮為右詔
琴高兮齊驅聞美人兮居海濱出入無際兮飛天津天
風吹兮下萬山授余素書兮役鬼神世溷濁兮多變態

貴魚目兮棄珠璣胡鬱悒兮吾將行駕風霆兮游方外
登嵩衡而騁望俯黃河兮如帶願美人兮再來遺桂枝
兮為佩心相知兮遠離如之何兮勿思

擬騷送梅如愚歸錢塘

雷填填兮海門倏而來兮濤山龍翔鳳翥兮故都玉帶
毬馬兮雲中君羌聲色兮為娛紛總總兮馳奔結桂枝
兮容與懷美人兮幽樊擘芙蓉兮為葢晉蕙芷兮為軒
朝晞髮兮若木夕弭節兮崑崙齋何為兮堂中魴何為

兮木上寧偃蹇兮好修金石仰觀兮江浪歲既晏兮將
歸湫桐瀨兮孤舫與君遊兮河之渚濯吾足兮石齒齒
與君擷兮山之秀托吾思兮華靡靡美人去兮增離憂
風蕭蕭兮夜雨天門兮九重白玉闕兮珠宮冠進賢兮
魏我鳴蒼佩兮春容挹斗以酌兮醇醪黎援箕以簸兮
清皇風



筠軒集卷十三